



REPUBLIKA E KOSOVËS / REPUBLIKA KOSOVA

GJYKATA THEMELORE GJAKOVË

Numri i lëndës: 2023:281244
Datë: 19.04.2024
Numri i dokumentit: 05597261

P.nr.2023:281244

NË EMËR TË POPULLIT

GJYKATA THEMELORE NË GJAKOVË – Departamenti i Përgjithshëm, gjyqtari i vetëm gjykues Samedin Cena, me bashkëpunëtorin profesional Sefedin Avdijaj, në lëndën penale kundër të akuzuarit RR.SH., nga Gjakova për shkak të veprës penale Posedimi i paautorizuar i narkotikëve, substancave psikotrope ose analoge nga neni 269 par.1 të KPRK-së, i akuzuar nga Prokuroria Themelore në Gjakovë – Departamenti i Përgjithshëm sipas Aktakuzës PP/II.nr.1567/23 të datës 13.12.2023, pas mbajtjes së shqyrtimit fillestar me datën 15.04.2024, në prezencën e Prokurores së Shtetit Shqiponja Jupa dhe të akuzuarit RR.SH., , me datë 17.04.2024, mori dhe publikisht shpalli, ndërsa me datë 19.04.2024 përpiloi këtë:

A K T G J Y K I M

I akuzuari,

RR.SH., , i lindur me datë ... në Gjakovë, ku edhe banon në rr.”...” p.nr, nga i ati .. dhe e ëma ..e gjinisë .. i martuar, baba i 2 fëmijëve, pronar i një biznesi – .., i gjendjes së mesme ekonomike, ka të kryer shkollën e mesme, student në Kolegjin .., me numër personal: .., shqiptar, shtetas i Republikës së Kosovës.

Ë S H T Ë F A J T O R

Sepse me datë 25.09.2023, rreth orës 23:10, në fshatin .. Komuna e Gjakovës, i pandehuri pa autorizim posedon narkotikë, substanca psikotrope apo analoge, në atë mënyrë që derisa ishte duke udhëtuar me veturë së bashku me dy shokë të tij, të njëjtit ndalohen nga ana e zyrtarëve policor, ku gjatë kontrollimit të veturës, tek ulëset e pasme ku ishte ulur personi G.I., gjendet një sasi narkotiku në një pako të cigares, të cilën e kishte hedhur i pandehuri me t’i vërejtur zyrtarët policorë, ku pas ekzaminimit laboratorik AKF/2023-2955/23-2789 të datës 10.11.2023, rezulton se është substancë narkotike e llojit Kanabis (Marihuanë), me peshë totale prej 0.63 ±0.0001 gram,

- Me çka ka kryer veprën penale Posedimi i paautorizuar i narkotikëve, substancave psikotrope ose analoge nga neni 269 par.1 të KPRK-së.

Gjykata në bazë të nenit 4,7,17,38,39,43,46,48,55,69,70 të KPRK-së dhe nenit 242, 269, 358, 364 dhe 365 të KPPRK-së, i shqipton:

DËNIM ME GJOBË DHE DËNIM ME KUSHT

Ashtu që i përcaktohet:

- I. Dënimi me gjobë në shumën prej katërqind e pesëdhjetë (450) Euro, të cilin dënim i akuzuari është i obliguar që ta paguaj në afat prej tridhjetë (30) ditësh nga dita e plotfuqishmërisë së këtij aktgjykimi dhe
- II. Dënimi me burg në kohëzgjatje prej 90 (nëntëdhjetë) ditësh, i cili dënim nuk do të ekzekutohet nëse i akuzuari në afatin prej 1 (një) viti, nga dita e plotfuqishmërisë së këtij aktgjykimi nuk kryen veprë tjetër penale.
- III. Nëse dënimin e shqiptuar me gjobë i akuzuari nuk mundet apo nuk dëshiron që ta paguajë gjykata konform nenit 43 par.3 të KPRK-së, do ta zëvendësojë me dënim me burg në kohëzgjatje prej 22 ditësh, ku një ditë me burgim do të llogaritet me (njëzet) 20 Euro të gjobës.
- IV. Gjykata mund ta revokon dënimin me kusht me burgim nëse i dënuari gjatë kohës së verifikimit në kohëzgjatje prej një (1) viti duke filluar nga dita kur ky aktgjykim të merr formën e prerë kryen një apo më shumë vepra penale.
- V. Obligohet i akuzuari që të paguaj shpenzimet procedurale sipas përlllogaritjes përfundimtare të gjykatës si dhe paushallin gjyqësor në shumë prej 25 € (njëzet e pesë Euro) si dhe në bazë të nenit 36 paragrafi 3 nënparagrafi 3.1 të Ligjit për kompensimin e viktimave të krimit shumë prej 20 € (njëzet Euro), në afat prej tridhjetë (30) ditësh nga dita e plotfuqishmërisë së këtij aktgjykimi.
- VI. Konfiskohet - narkotiku i llojit, Kanabis (Marihuanë), me peshë totale prej 0.63 ±0.0001 gram, konform nenit 269 par.3 të KPRK-së.

A r s y e t i m

1. Ecuria e procedurës penale

Prokuroria Themelore në Gjakovë – Departamenti i Përgjithshëm pranë kësaj gjykate, ka parashtruar aktakuzën me numër PP/II.nr.1567/23 të datës 13.12.2023, kundër të akuzuarit RR.SH., nga Gjakova, për shkak të veprës penale Posedimi i paautorizuar i narkotikëve, substancave psikotrope ose analoge nga neni 269 par.1 të KPRK-ës, duke propozuar gjykatës që i njëjti të shpallet fajtor dhe të dënohet sipas ligjit.

Gjykata për këtë çështje juridiko penale ka caktuar dhe ka mbajtur shqyrtimin fillestar me datën 15.04.2024, për të akuzuarin RR.SH., për veprën penale Posedimi i paautorizuar i narkotikëve, substancave psikotrope ose analoge nga neni 269 par.1 të KPRK-së, në të cilin shqyrtim kanë marrë pjesë Prokurorja e Shtetit Shqiponja Jupa dhe i akuzuari Rr. Sh.

I akuzuari RR.SH., pas leximit të aktakuzës nga Prokurori i shtetit deklaroi se pas sqarimeve të mjaftueshme nga ana e gjykatës për favoret dhe pasojat e pranimit të fajësisë, lidhur me fajësinë deklaroi se e pranoi fajësinë ashtu siç është përshkruar në dispozitivin e aktakuzës, i premtoj gjykatës se në të ardhmen nuk do të kryej ma vepër penale.

Prokurorja e Shtetit Shqiponja Jupa lidhur me pranimin e fajësisë nga i akuzuari deklaroi se nuk e kundërshtojmë pranimin e fajësisë të bërë nga ana e të akuzuarit Rr. Sh. pasi që pranimi është bërë në mënyrë vullnetare pa presion duke i ditur, pasojat dhe benefitet e një pranimi të tillë, pranimi i fajësisë mbështet në faktet e çështjes konkretisht provat materiale dhe personale që përmban aktakuza, e që në bazë të kësaj përmbushen elementet e veprës penale për të cilën ngarkohet i akuzuari. Andaj gjykatës i propozoj që të njëjtin ta shpall fajtor, ta dënoj sipas ligjit dhe ta obligoj në pagesën e shpenzimeve procedurale. Lidhur me vendimin për dënimin që si rrethanë lehtësuese të merret pranimi i fajësisë të bërë nga ana e të akuzuarit Rr. Sh. në këtë seancë, ndërsa si rrethanë rënduese të merret për bazë se më parë i akuzuari Rr. Sh. ka qenë i dënuar për veprën penale Blerje, posedim, shpërndarje dhe shitje e pa autorizuar e narkotikëve, substancave psikotrope dhe analoge në bashkëkryerje nga neni 267 par 1 lidhur me nenin 31 të KPRK-së i cili është dënuar me Aktgjykim të Gjykatës Themelore Gjakovë PKR.nr. 46/22 të datës 26.06.2023 dënim me burgim 1 vit e 6 muaj si dhe me dënim me gjobë në shumën prej 1000 Euro, po ashtu qëndrojmë pranë propozimit të cekur në pikën III të aktakuzës ashtu që konform nenit 269 par 3 të KPPRK – së që të bëhet konfiskimi dhe shkatërrimi i narkotikut, substanca e llojit kanabis (marihuanë), në peshë totale prej 0.63 gram.

2. Vlerësimi i pranimit të fajësisë

Gjyqtari i çështjes në shqyrtim fillestar pas dëgjimit të palëve ka marrë aktvendim me të cilën ka aprovuar pranimin e fajësisë nga i akuzuari RR.SH., nga Gjakova, për shkak të veprës penale Posedimi i paautorizuar i narkotikëve, substancave psikotrope ose analoge nga neni 269 par.1 të

KPRK-ës, nga se ka ardhur në përfundim se pranimi i fajësisë nga ana e të akuzuarit është bërë në pajtim me nenin 242 të KPPRK-së.

Gjatë pranimit të fajësisë gjykata ka fituar bindjen se i akuzuari e ka kuptuar natyrën dhe pasojat e pranimit të fajësisë për veprën penale, që i vihet në barrë, dhe është bindur se pranimin e ka bërë në baza vullnetare, pas sqarimeve të mjaftueshme nga ana Gjykatës për pasojat dhe favorët e pranimit të fajësisë si dhe duke u mbështetur edhe në faktet dhe provat që i përmban Aktakuza, në materialet e prezantuara nga Prokurorja e shtetit dhe çdo provë tjetër dhe se aktakuza nuk përmban asnjë shkelje të qartë ligjore ose gabime faktike, andaj ka aprovuar pranimin e fajësisë të bërë nga ana e të akuzuarit.

Meqenëse i akuzuari ka pranuar fajësinë gjykata ka konsideruar se nuk do të ketë procedurë të provave e as fjalë përfundimtare.

3. Gjendja faktike e vërtetuar

Duke u bazuar në këto që u cekën më lartë gjykata ka vërtetuar këto gjendje faktike se:

I akuzuari RR.SH., nga Gjakova ka kryer veprën penale Posedimi i paautorizuar i narkotikëve, substancave psikotrope ose analoge nga neni 269 par.1 të KPRK-së, në kohën, vendin dhe mënyrën e përshkruar si në dispozitiv të këtij Aktgjykimi, ashtu që me datë 25.09.2023, rreth orës 23:10, në fshatin ... Komuna e Gjakovës, i pandehuri pa autorizim posedon narkotikë, substanca psikotrope apo analoge, në atë mënyrë që derisa ishte duke udhëtuar me veturë së bashku me dy shokë të tij, të njëjtit ndalohen nga ana e zyrtarëve policor, ku gjatë kontrollimit të veturës, tek ulëset e pasme ku ishte ulur personi Granit Ibrahim i gjendet një sasi narkotiku në një pako të cigares, të cilën e kishte hedhur i pandehuri me t'i vërejtur zyrtarët policorë, ku pas ekzaminimit laboratorik AKF/2023-2955/23-2789 të datës 10.11.2023, rezulton se është substancë narkotike e llojit Kanabis (Marihuanë), me peshë totale prej 0.63 ±0.0001 gram.

Këtë gjendje faktike gjykata e vërtetoi edhe nga provat në shkresat e lëndës dhe atë: Raporti i Oficerit A.L., i datës 26.09.2023; Deklarata e të pandehurit RR.SH., e dhënë në Stacionin Policor në Gjakovë me datë 25.09.2023 dhe 28.09.2023; Deklarata e dëshmitarit G.I., e dhënë në Stacionin Policor në Gjakovë me datë 25.09.2023 dhe me datë 04.12.2023; Deklarata e dëshmitarit A.V., e dhënë në Stacionin Policor në Gjakovë me datë 25.09.2023; Vërtetimi mbi sekuestrimin e përkohshëm të sendeve i datës 25.09.2023; Raporti i ekspertimit AKF/2023-2955/23-2789 i datës 10.11.2023; Fotodokumentacioni dhe shkresat tjera në lëndë.

4. Elementet e veprës penale

Në nenin 269 paragrafi 1 të KPRK-së, është parashikuar se formën themelore të veprës penale posedimi i paautorizuar i narkotikëve, substancave psikotrope ose analoge e kryen: “*Kushdo që pa autorizim posedon narkotikë, substanca psikotrope apo analoge, dënohet me gjobë dhe me burgim prej një (1) deri në tre (3) vjet*”, ndërsa në paragrafin 2 të këtij neni

parashihet “*kryesi që kryen veprën nga paragrafi 1 i këtij neni për herë të parë dhe i cili posedon më pak se tre (3) gram të substancave narkotike apo substancave psikotropike ose analoge dënohet me gjobë ose me burgim deri në një (1) vit*”.

5. Vendimi

Duke u bazuar në këto që janë cekur me lartë, si dhe me vetë pranimin e fajësisë nga ana e të akuzuarit, gjyqtari i çështjes të akuzuarin Rr. Sh. nga Gjakova, e ka shpallur fajtor për veprën penale për të cilën ngarkohet ngase në veprimet e të akuzuarit të përshkruara si në dispozitivin e këtij aktgjykimit formohen të gjitha elementet e veprës penale, posedimi i paautorizuar i narkotikëve, substancave psikotrope ose analoge nga neni 269 par.1 të KPRK-së, e bazuar në këtë ka vendosur që të akuzuarin të gjykojë në bazë të ligjit, e më parë duke vërtetuar përgjegjësinë penale juridike të tij.

6. Rrethanat që janë marrë për bazë me rastin e shqiptimit të dënimit

Me rastin e matjes së dënimit, Gjykata i ka pasur parasysh të gjitha rrethanat lehtësuese dhe rënduese, të parapara nga neni 69 dhe 70 të KPRK-së, të cilat ndikonin në zbutjen apo ashpërsimin e dënimit.

Si rrethanë lehtësuese, Gjykata ka vlerësuar rrethanat personale të akuzuarit: i vetëdijshëm për rrezikshmërinë shoqërore që paraqet kjo vepër penale dhe premtimin se në të ardhmen nuk do ta përsëritë këtë vepër penale. Ndërsa si rrethana posaçërisht lehtësuese gjykata vlerësoi pranimin e fajësisë.

Ndërsa si rrethanë rënduese në këtë rast gjykata ka marrë parasysh rrezikshmërinë e kësaj vepre penale.

Gjykata ka ardhur në përfundim se me dënimin e shqiptuar si në dispozitiv të këtij aktgjykimi, do të arrihet efekti dhe qëllimi i tij nga neni 38 i KPRK-së dhe ky dënim i tillë i shqiptuar sipas bindjes së gjykatës është në proporcion me veprën penale të kryer dhe me rrethanat personale të cilat i posedon i akuzuari dhe se dënimi i shqiptuar do të ndikoj në parandalimin të akuzuarit nga kryerja e veprave penale në të ardhmen dhe do të bëjë rehabilitimin e tij dhe do të shpreh gjykimin shoqëror për veprën penale, ngritjen e moralit dhe forcimin e detyrimit për respektimin e ligjit.

7. Vendimi për konfiskim

Konform nenit 269 dhe nenit 276, par.1 dhe par.2, nënpar.2.4 gjykata mori vendim për konfiskimin e substancës narkotike Kanabis (Marihuanë), me peshë totale prej 0.63 ±0.0001 gram, të sekuestruar me datë 25.09.2023.

8. Vendimi për shpenzimet e procedurës penale

Vendimi mbi shpenzimet procedurale në emër të paushallit gjyqësor, është marrë konform nenit 452 paragrafi 1 të KPP-së, si dhe për shpenzimet për programin për kompensimin e viktimave të krimit duke u bazuar në nenin 36 paragrafi 3, nënparagrafi 3.1 të Ligjit Nr.08/L-109 për Kompensimin e Viktimave të Krimit.

Me sa u tha më lartë u vendos si në dispozitiv të këtij aktgjykimi, konform nenit 364 të KPPRK-së.

GJYKATA THEMELORE NË GJAKOVË
Departamenti i Përgjithshëm
P.nr.2023:281244, më datë 19.04.2024

Bashkëpunëtor profesional
Sefedin Avdijaj

Gjyqtari
Samedin Cena

KËSHILLË JURIDIKE: Kundër këtij aktgjykimi është e lejuar ankesa në afat prej 30 ditësh pas marrjes së aktgjykimit, në Gjykatën e Apelit të Kosovës në Prishtinë, nëpërmjet kësaj Gjykate.